

# INUIT ATAQATIGIIT

## Inatsisartuni



28. maj 2021

Inatsisartut Suleriaasianni § 37, imm. 1 naapertorlugu apeqquitiit uku Naalakkersuisunut saqqummiuppakka:

### **Naalakkersuisunut apeqquitiit:**

1. Qinigaaffiup iluani imigassamut tunngasunik Naalakkersuisut sunik anguniagaqarpat?
2. Imigassamik pisariaqartitsineq imigassamillu atuinerup appartinneqarnissaa pillugu Naalakkersuisut qanoq eqqarsaatersuuteqarpat?
3. Innuttasut imigassamik pisariaqartitsinerat innuttaasullu imertariaasiat pilugu Naalakkersuisut qanoq eqqarsaatersuuteqarpat?
4. "Kalaallit Nunaanni atorneerluinermit aningaasartuutit" misissuineq Peqqussutsimut Naalakkersuisoqarfimmit 2015-mi saqqummiunneqartoq ilisimavara, tassanilu ukiumut atorneerluinermit aningaasartuutit tamarmiusut 80 mio. kr-iunerat takuneqarsinnaavoq. Imigassartorneermit attuumasumik ajoqusernernerut kiisalu katsorsaanerit ukiumut inuiaqatigiinnut qanoq aningaasartuutaasarnernik Naalakkersuisut paasissutissanik nutaanik pigisaqarpat?
5. Assersuutigalugu Islandimi Savalimmiunilu immikkut ittumik imigassamik tuniniaanermik, immikkut pisiniarfinnik tuniniaasarnernik aqqissuussinernerut assingusunik atulersitsinissamik Naalakkersuisut eqqarsaatersuuteqarpat?
6. Apeqquut 5-mi aqqissuussinertut taaneqartumik atulersitsinissami, assersuutigalugu inatsisitigut aporfinnik Naalakkersuisut eqqummaariffeqarpat?
7. Apeqquut 5-mi aqqissuussinertut taaneqartunik atulersitsinerup assersuutigalugu Islandimi, Savalimmiuni Finlandimilu imigassamik atuinermit sunniutaanik paasissutissanik naatsorsoqqissaakkanik Naalakkersuisut ilisimasaqarpat?

(Inatsisartunut ilaasortaq Pipaluk Lynge-Rasmussen, Inuit Ataqatigiit)

### **Tunngavilersuut:**

Meerarpassuit ilaqtariippassuillu Kalaallit Nunaanni imigassamik atorneerluinermit sunnersimaneqarput. Nunatsinni imeriaaserput inuiaqatigiinnut inuttut aningaasaqarnikkullu akisuvoq. Ilaat angerlarsimaffeqanngillat, meeqqallu ilaat angajoqqaat imigassamik atorneerluisuunerat pissutigalugu børnehjeminut nuutsinneqartarput.

Nunani avannarlerni amerlanerni naalagaaffiup imigassamik akulinnik tuniniaaneq aqutaraa, tamannalu naalagaaffiup suliffeqarfiutaasa imigassamik akulinnik nioqqutissianik kisermaassillutik tuniniaasarnerisigut pisarpoq; Islandimi: Vínbúðin, Savalimmiuni: Rúsdrekkasøla Landsins, Finlandimi: Alko, Norgimi: Vinmonopolet Sverigemilu: Systembolaget. Taamaallaat Kalaallit Nunaanni Danmarkimilu periuseq tamanna atorneqanngilaq, taamaammallu imigassamik akulinnik tuniniaaneq pillugu inatsisinullu tassunga tunngasunik Naalakkersuisut suliniuteqarnerisut tusassallugu soqutiginarlippara.

Apeqqutima ullut qulit iluini akineqarnissaat qinnutigaara.